

毘盧遮那品第六 四佛法門 疏鈔

時彼如來為欲調伏諸眾生故，於眾會道場海中，
說【普集一切三世佛自在法】脩多羅。世界微塵數脩多羅而為眷屬。
隨眾生心，悉令獲益。

（六）廣演法門·文分為五：〈一〉佛轉法輪·〈二〉威光獲益·〈三〉以偈讚述·〈四〉傳化眾生·〈五〉佛加讚勵。

〈一〉佛轉法輪者：佛解脫用，主教宣示·剎塵眷屬，隨機益殊。

是時大威光菩薩聞是法已，即獲【一切功德山須彌勝雲佛】宿世所集法
海光明：所謂得 1. 一切法聚平等三昧智光明。

智即是體·光明語用·所照境殊，故分十一也：

《一》深定智明：【一切法聚】，略有三義：

一、正定等三· 二、善惡等三·

三、總收一切，不出有為無為二種法聚。

** 二位相收，一味性現，故云平等·定中證此名彼三昧。

【智即是體】者：智體如日·用如日光·日體雖一，能放千光·

智體不殊能照萬境·又日光無二所照物殊·智光無差隨境分照。

【正定等】者：謂等取邪定不定聚故。

【善惡等】者，等取無記·三總收為二·四【二位】下，融而為一。

2. 一切法悉入最最初菩提心中住智光明。

《二》大心智明：謂後後因果皆入初心·略有三義：

一、後因初得·故言一切悉入。若修途至在初步，學者祿在其中。

二、菩提直心·正念真如·真如門內攝一切法。

三者、三德開顯·初後圓融·初發心時便成正覺故。

【謂後後因果皆入初心】者，總釋也：六位相望故成後後·五位為因·妙覺為果。又位位之中亦有因果·如十地中調柔果等。

【若修途至於初步】者：即肇公不遷論·論云：

「是以如來功流萬古而常存·道通百劫而彌固·成山假就於始簣·修途託至於初步者·果以功業不可朽故也」·

彼論意云：物各性住，故無往來。今雖引文用意少別·

此云本出莊子「千里之途在於足下·其猶滔滔之水本於濫觴·合抱之木生自毫末」·

後由初得故曰在初·學者祿在其中矣。意亦同於上。

即論語子張學干祿·子曰「多聞闕疑，慎言其餘，則寡尤·多見闕殆，慎行其餘，則寡悔。言寡尤、行寡悔，祿在其中矣」·

注曰「干，求也·祿，位也。雖未得祿，得祿之道也·故得祿在後。由學而能得，故居學中」·此上一義通諸經論。

【菩提直心等】者，即起信論法性宗中實教之意·然菩提心總有三心·今但直心中攝·以直心正念真如。真如即起信生滅真如二門之一·故云真如門內。然此二門者各總攝一切法·唯取真如·謂一切法及後後諸德皆依真如·真如無二通為諸法之體。今菩提心正念真如·故能攝也。

【三德開顯前後圓融】者，即別教一乘圓融義也。不同餘義。

言【三德開】者，即發心功德品。初發心時得如來一身無量身。則法身開顯。得究竟智慧，得一切智慧光明，則般若開顯。不於諸法少有所得，即以心離妄取，寂照雙流，故解脫開顯。故此心中無德不攝。因該果海，並在初心。從初發心時便成正覺，即梵行品文。

言【初後圓融】者，以初是即後之初。後是即初之後。以緣起法離初無後、離後無初。故舉初攝後。若約法性融通，一切因果不離心性。契同心性無德不收。以一切法隨所依性。皆於初心頓圓滿故。

故梵行品云「若諸菩薩能與如是觀行相應。於諸法中不生二解。一切佛法疾得現前。初發心時即得阿耨多羅三藐三菩提。知一切法即心自性。成就慧身不由他悟」。如玄文已明。下當更說。

3. 十方法界普光明藏清淨眼智光明。

大智智明：【法界】者，所照之體大也。

【普光明】者，即相大也。智慧光明遍照法界義故。蘊恆沙性德故名為藏。妄惑本空故云清淨。明見稱眼。見性肉眼即同佛眼。

【大智智明】者，經中清淨眼是總相。此眼何見。見心三大。疏中囑經，唯配二大。略無用大。用即智攝故。

從【智慧光明遍照法界義故】者，即暗引起信，證普光明為相大義。即起信釋生滅門中所顯義大，雙明體相之文。

論云「復次真如自體相者。一切凡夫聲聞緣覺菩薩諸佛無有差別。非前際生、非後際滅。畢竟常住」。

釋曰：上釋體大。今不引之。以法界為體。義易知故。

論云「從本已來·性自滿足一切功德·所謂自體有大智慧光明義故·遍照法界義故·真實識知義故·自性清淨心義故·常樂我淨義故·清涼不變自在義故」。

釋曰：上之六句皆是相大：

- 一、本覺智明義·二、本覺顯照諸法義·三、照時無倒義·
- 四、體離惑染義·五、性德圓備義·六、性德無遷義。

今不引後四而引前二有智遍照，證以普光明為相大義·恐人以法界為所照，普光明為能照·故引此文。

相大本有則皆所照·以淨眼智明為能照耳。

從【蘊恆沙】下，釋經藏字，具二藏義：蘊恆沙德即不空藏·妄惑本空即是空藏·故清淨言向屬所觀之藏·向下屬能見之眼·無障蓋故言【見性肉眼即名佛眼】者，即涅槃第六經云「善男子·聲聞之人雖有天眼·故名肉眼·學大乘者雖有肉眼·乃名佛眼·何以故·是大乘經名為佛乘·如此佛乘最上最勝·諸佛見性故」。

4. 觀察一切佛法大願海智光明。

大願智明：知諸佛法，願為本故。

5. 入無邊功德海清淨行智光明。

大行智明：無邊果德此行入故。

6. 趣向不退轉大力速疾藏智光明。

速疾智明：謂趣入無生，功用不退·無功大力，一行含多·受斯稱也。

【無功大力一行含多】：由八地得無功用，如乘船入海·故云大力速疾

【一行含多】者，先以一身起行·至此八地以無量身起行·

一一行中起一切行故。

7. 法界中無量變化力出離輪智光明。

神通智明：三輪幹事，出離不能。

8. 決定入無量功德圓滿海智光明。

大福智明·照福嚴故。

9. 了知一切佛決定解莊嚴成就海智光明。

大解智明：謂佛勝解力成莊嚴海。

10. 了知法界無邊佛現一切眾生前神通海智光明。

佛用智明·普周法界。

11. 了知一切佛力無所畏法智光明。

佛德智明·降魔制外：後三佛境故但了知·餘可證知·故云得云入。

【餘可證知·故云得云入】者：智論三十一云「通徹名入·入亦證也·

得者獲之在己也」。 (以下接偈頌)

(第二佛)

諸佛子。汝等應知彼大莊嚴劫中有恆河沙數小劫。人壽命二小劫。諸佛子。彼一切功德山須彌勝雲佛，壽命五十億歲。

遇第二波羅蜜善眼莊嚴王佛：

謂將說後佛，故總論劫壽。明多小劫者，欲顯多佛現故。

說人壽佛壽者，由佛壽促而人壽長。故得威光一生歷事三佛。

「經」彼佛滅度後有佛出世，名【波羅蜜善眼莊嚴王】。亦於彼「摩尼華枝輪大林中」而成正覺。

二、正顯佛興。文分為五：（一）明滅後佛興。（二）觀相獲益。（三）讚德勸詣。（四）眷屬同歸。（五）聞經悟入。

（一）明滅後佛興：此中佛名，謂智導萬行，皆到彼岸。見性了了故名善眼。果由因飾是曰莊嚴。

爾時「大威光童子」見彼如來成等正覺現神通力。

即得念佛三昧名【無邊海藏門】。即得陀羅尼名大智力法淵。

即得大慈名普隨順眾生調伏度脫。即得大悲名遍覆一切境界雲。

即得大喜名一切佛功德海威力藏。即得大捨名法性虛空平等清淨。

即得般若波羅蜜名自性離垢法界清淨身。即得神通名無礙光普隨現。

即得辯才名善入離垢淵。即得智光名一切佛法清淨藏。

如是等十千法門皆得通達。

(二) 觀相獲益中二。〈一〉觀相。〈二〉【即得】下，正獲益也。

〈一〉觀相：即獲益之由也。

〈二〉正獲益有二：《一》列。《二》結。

《一》列有十種：

一、【念佛三昧】者：菩薩之父，故首明之。乃至十地。不離念佛。

【無邊海藏門】者：蘊積名藏。深廣稱海。然略有三義：

(一) 由此定中見多佛故。下文云「以佛為境界。專念而不捨。是人得見佛。其量與心等」。由念能見。所以稱門。

(二) 一一佛德是無邊海藏：由念能知。所以稱門。

云何【無邊海】：劫海所修有行願海。成就色身有相好海。成就智身有辯才海。建立念處有名號海。修諸助道有功德海。安立眾生有淨刹海。如是諸海一一無邊。各各出生蘊積名藏。

(三) 無邊勝德由念佛生。故此一門深廣蘊積。何者：

念法性身則契如理。念功德身成無邊德。念相好身證無邊相。障無不滅。德無不生。一言蔽諸。總由念佛。從此通悟。所以稱門。即此一門說不可盡。

二【大智力法淵】：總持大智能達深法。

三、無緣普應。

四、等除熱惱。

五、佛深德海蘊積力用。菩薩緣此喜遍身心。

六、悲則心感。喜便浮動。深契法性則曠若虛空。悲喜兩亡為平等清淨。

七、般若者，覺法實性，離分別也。有可離者非真離也。知自性離不復離也。無離之離即真法界。真法界者本來清淨。法界清淨即般若清淨。般若清淨則萬法本淨。萬法淨者。無淨無不淨。為真淨也。實相般若為萬法之體。觀照冥此眾德攸依。故云身也。

八、通用智俱。故無礙隨現。

九、入法之深，離說之垢。

十、智照佛法淨所知障，含藏眾德。

《二》結：明歷事增進，故云十千。通達之言，釋前即得。

【菩薩之父，故首明之】者：即智論文。論云「菩薩以般若波羅蜜為母。般舟三昧為父」。般舟即念佛。此翻為佛立三昧。良以念佛即真涉事與方便同故得稱父。又念佛成佛是親種故。

言【乃至十地不離念佛】者：十地之中皆云一切所作不離念佛念法念僧等：上辨先明所以。

後【無邊海藏】下，牒釋別名：於中先牒經略釋。後【然略有三】下，別示其相。三義中：

一、定見多佛。二、佛有多德。此二並就所念名無邊藏。

三【無邊勝德】下，約能念名藏。於中三：初、總明。次【何者】下，徵釋。略舉三身。後【障無不滅】下，結歎。

故賢護經中廣列諸德，以徵其因。佛答皆從念佛而生。

【一言蔽諸】者，即論語「子曰。詩三百。一言以蔽之。曰思無邪」。謂歸於正也。念一佛號亦名一言。直取一言只一佛字。故自四祖禪要，唯稱佛言耳。

【般若者，覺法實性，**離分別也**】者：此總釋一門，亦當別釋自性離垢之言。即**大般若**曼殊室利分中，慈氏菩薩云「若諸菩薩聞是甚深般若，心不沈沒，已近無上正等菩提，何以故，是諸菩薩現覺法性，離一切分別，如大菩提故」。今此般若亦**覺法自性，名自性離**。

離字兩向：向上屬自性離，向下屬離垢，即離分別之垢也。

從【有可離】下，別釋經文，成上總釋：有可離者非真離也，反釋初句，成上性離。知自性離不復離也者，順釋初句，成上離分別。言不知性離，謂有可離，即是分別，今知性離，知相即寂，故無分別。

從【無離之離即真法界】者，即躡上釋下法界言也，正同起信。

所言覺者謂心體離念，離念相者，等虛空界，無所不遍，法界一相，即是如來平等法身，法身即真法界。

【本來清淨】者，躡上法界釋清淨言，既自性離是真法界，則本自淨，非觀令淨，非去垢淨，是故經云法界清淨。

彼【法界清淨即般若清淨】者，即以上義成此般若得清淨名，此有二意：
一、由體清淨方成般若，故此般若受法界清淨之名。
二者、性無二故。

故大般若難信解分云「復次，善現，般若波羅蜜多清淨故色清淨，色清淨故一切智智清淨，何以故，若般若波羅蜜多清淨，若色清淨，若一切智智清淨，無二無二分、無別無斷故，名無二性」。

從【般若清淨則萬法本淨】者，亦有二義：

一、以般若照一切法知本淨故。

二、二者亦是性無二故，義同上引，般若清淨則色清淨，遍歷諸法。

略舉八十餘科：謂五蘊、十二入、十八界、四諦、十二緣、六波羅蜜，乃至菩提涅槃皆如色說。故萬法本淨。

從【萬法淨者，則無淨無不淨】者。拂其淨相。夫言淨者。懸法本無生，性寂諸相，故名為淨。豈待蕩蕩無物方稱淨耶。非但事無非為真淨。見真本淨事為非淨。亦是相待，能所未忘。安得稱淨。故真善知識令看淨門云。性本清淨，淨無淨相，方見我心。即斯義矣。

故淨名云「垢淨為二。見垢實性，則無淨相。離於見相，是為入不二法門也」。下經云「若有見正覺。解脫離諸漏。不著一切世。彼非證道眼。若有知如來。體相無所有。修習得明了。是人疾作佛」。

【實相般若】下：釋經身字。身有三義：謂體依聚義。今實相般若則法身之體。觀照般若同報身之依。化身名聚，淺故不說。則眷屬般若亦得名身，同聚義故。

(以下接頌，頌後接下經文)

諸佛子。大威光童子說此頌時。以佛神力其聲無礙。一切世界皆悉得聞。
無量眾生發菩提心
時大威光王子與其父母并諸眷屬及無量百千億那由他眾生，前後圍繞。
寶蓋如雲。遍覆虛空。共詣【波羅蜜善眼莊嚴王如來】所。
其佛為說【法界體性清淨莊嚴脩多羅】。
世界海微塵數等脩多羅而為眷屬。

<一> 佛為說經：主經：法界體性，大方廣也。清淨佛也。莊嚴即華嚴也。有多眷屬者，顯此教圓。

彼諸大眾聞此經已。

得清淨智名【入一切淨方便】。

得於地，名【離垢光明】。

得波羅蜜輪，名【示現一切世間愛樂莊嚴】。

得增廣行輪，名【普入一切剎土無邊光明清淨見】。

得趣向行輪，名【離垢福德雲光明幢】。

得隨入證輪，名【一切法海廣大光明】。

得轉深發趣行，名【大智莊嚴】。

得灌頂智慧海，名【無功用修極妙見】。

得顯了大光明，名【如來功德海相光影遍照】。

得出生願力清淨智，名【無量願力信解藏】。

<二> 當機獲益：亦有十益。既云大眾·或一人得一、或二三四、或具十者·威光先證故略不標·大眾之言亦已含矣·故下佛讚。

然此十事略為二釋：

一者、如次配於十地十度·或取地義、或取度義者。

一者達一切法本來清淨名清淨智·不取淨相是名方便·

即初地入證之智也。

二、則二地離破戒垢，是所除障·照諸善品即戒光明。

三、即忍度：忍為上嚴一切愛樂。

四、無剎不入、無法不照、無見不淨，是為精進。增廣眾行，約地義釋。以諸道品，燒無盡惑，成無邊光。

五、趣向諸行能入俗也·禪度增故性能離垢·涉俗化物成福德雲·不迷實理為光明幢。

六、般若現前名隨入證·照深緣起名法海光。

七、功用已遠將入無功，為深發趣·權實無礙為大莊嚴。

八、見法實性，無功而修，為極妙見·由此智慧復得灌頂·故仁王經

云「後之三地同遣無明·同無功用」·故非灌頂地·是灌頂智

九、顯了藥病是功德海相·辯才遍應，若月影流光。

十、智圓離障方於佛願而生信解，故曰出生。

**二者此上十門，隨一一事以立其名·未必全將配於地位·或通配諸位·或復不次·以人無量隨證不同·普賢巧說故·文含多義。

【故仁王經云後之三地等】者：即教化品中第八，
名等觀菩薩偈云「等觀菩薩二禪王變化法身無量光等」。

九地云：慧光開士三禪王。十地云：灌頂菩薩四禪王。

後都頌上三地云

「等慧灌頂三品士，除前除習無明緣，
無明習相故煩惱·二諦理窮一切盡」。

釋曰：既總牒三地除無明習·是故疏云同遣無明。

言非灌頂地，下義釋彼經。彼經灌頂，地也·自當第十·
故云非灌頂地。然十地亦用盡無明習無功用智而得灌頂·
故云是灌頂智也。

(以下接頌)

(第三佛)

諸佛子。波羅蜜善眼莊嚴王如來入涅槃已。喜見善慧王尋亦去世。大威光童子受轉輪王位。

彼摩尼華枝輪大林之中，第三如來出現於世名【最勝功德海】。

(立斯號者，功德海滿無加過也。)

時大威光轉輪聖王見彼如來成佛之相。與其眷屬及四兵眾、

城邑聚落一切人民、并持七寶，俱往佛所。

以一切香摩尼莊嚴大樓閣奉上於佛。

時彼如來於其林中說【菩薩普眼光明行脩多羅】。

世界微塵數脩多羅而為眷屬。

四、佛為說經：見普法故名為普眼。以慧為性故曰光明。況一眼即十眼融無障礙。眼外無法方真普眼。以諸緣發見，即緣各為根。因沒果中緣皆號眼。故全色為眼。恆見色而無緣。全眼為色。恆稱見而非我矣。

【見普法故名為普眼】者：此釋經名。而有三義：

- 一、約所見稱普：言【普法】者，一具一切。一一稱性。同時具足等。斯即十眼之內一眼之能。經云「一切智眼見普門法界故」。
- 二【況一眼即十眼，融無障礙】：約能見稱普。如五眼中佛眼。四眼入佛眼皆名佛眼。如四河入海，無復河名，而具海味。故金剛經云「如來有肉眼不。如是世尊。如來有肉眼。乃至云。如來有佛眼不。如是世尊。如來有佛眼」。今十眼亦耳。隨一具十。而

諸教說·唯佛眼具五，餘四則無。今因果之人，皆許一眼即具十眼·不唯後勝具於前劣·若一不具十則非普眼。

言【十眼】者，離世間品說：謂一、肉眼·二、天眼·三、慧眼·四、法·五、佛·六、智·七、光明·八、出生死·九、無礙·十、一切智。其融無礙則有二義：一者成上十眼無礙·二者成下即能所無礙。

三【眼外無法，方真普眼】下，約心境互收方稱普眼·此上標也。

【以諸緣發見】下，別釋所以·如大乘法師以九緣發識、眼根名眼，餘不名眼·今則例之·眼根能發識，眼根得名眼·空明能發識，亦得同名眼·餘六例然·以緣起之法，各有有力無力相成立故。

次云【因沒果中，緣皆號眼】者：九緣不見色，不見不名眼·

九緣皆見色，沒果同名眼·以皆全有力故。

言【全色為眼·恆見色而無緣】者：色是所緣之境·眼是能緣之根·今即是眼·故無緣也。

言【全眼為色，恆稱見而非我】者：眼是我能見·今全為色，正見之時即非我也·此即賢首之意。下更有言云「非我離於情想·無緣絕於貪求·收萬像於目前·全十方於眼際·是以緣義無盡，隨見見而不窮」·物性叵思·應法法而難準·法普即眼普·義通乃見通·體之自隱隱·照之遂重重·然後窮十方於眼際·鏡空有而皎明·收萬像以成身·顯事理而通徹也。

爾時大威光菩薩聞此法已，得三昧名【大福德普光明】。

得此三昧故，悉能了知一切菩薩、一切眾生，過現未來福、非福海。

五、威光得益：五度皆福，定為最大·寂無不照名普光明。

【得此已】下，彰其定用：

【福非福】言，略有二意：

一、福即是善·非福是罪·

二、福即是相·非福即性：雙了性相·

故經云「福德即非福德性」·此即深也。了一切者，廣也·故有海言。

**遇於初佛但得十者，自力未勝故。次佛十千者，道轉深故。

今唯一者，道已滿故。

【五度皆福，定為最大】者：然六波羅蜜攝成二嚴·總有兩意：

一、前五為福·後一為智。

二、二者前三唯福·後一唯智。進定通二·成前為福·成後屬智。

今以經中云得三昧名大福德·故用前門。

【福即是善、非福是罪】者：即百論捨罪福品意·故論引金剛「福尚應捨，何況非福」·以善捨惡·以無相智捨福·則善惡兩忘。

今云了者：一、了其相·二、了體空·三、了無礙。

【福即是相】下，即以世諦說福·第一義中福亦不存故·引金剛如來說福德相隨俗說也·即非福德相當體空寂也·是名福德相，結

正義也。若福即非福，方名真福。若以福為福，非真福也。有人以第三句亦約俗諦，非得經意。

(第四佛)

諸佛子。彼摩尼華枝輪大林之中，

復有佛出，號【名稱普聞蓮華眼幢】。

是時大威光，於此命終。生須彌山上寂靜寶宮天城中。

為大天王。名【離垢福德幢】。共諸天眾，俱詣佛所。

雨寶華雲以為供養。

時彼如來為說【廣大方便普門遍照脩多羅】。

世界海微塵數脩多羅而為眷屬。

時天王眾聞此經已。得三昧名【普門歡喜藏】。

以三昧力，能入一切法實相海。獲是益已。從道場出。還歸本處。

遇第四名稱普聞蓮華眼幢佛：文分為四：

一、佛出人中。二【是時】下，天王就供。三【時彼】下，如來說法。

四【時天王】下，得益還歸。

一、佛出人中者：約相，目類青蓮。約德，心無所染。相德高顯，名稱外彰。摧邪眾歸，故曰幢也。

二、天王就供中二：先、明菩薩行進。報處天宮。此城即是品初所列之一。後、知佛可歸。持華往供。

三、如來說經者：方便之言略有三種：

(一)、無實權施。曲巧方便也。

(二)、理本無言，假言而言·大方便也。

(三)、權實無滯·亦大方便·事理皆彰，方曰普門。

四、得益還歸中：聞上普門·正受安住·法喜無盡·故名曰藏·
由此證達諸實相海。此劫之中，十須彌塵數如來·今但云四·
又無結會古今，現證得益等者·經來未盡故也。
若結會者，應云爾時威光菩薩者，毘盧遮那是等。

所信因果會竟。

【無實權施】者：如說臨門三車即是權教三乘·本無三乘說有三乘·
虛指三車出門不獲·是也。

【理本無言】者：亦法華云「諸法寂滅相·不可以言宣·以方便力故·
為五比丘說」·是也。

【權實無滯】者：即涉有未始迷空·觀空不遺於事·即如來方便知見
波羅蜜，皆已具足。

(毘盧遮那品竟。)